

## पवनेंद्र पवन दे छंद धौलाधार

जान दित्ति गोरां छाल हबने दे लाई कुंडे  
जगह-जगह सिव घुम्में चुक्की करी लो था मुंहडे  
सिवे ते न मोह जित्ते विष्णुएं टोटे कित्ते  
अंग टिरे जित्थू-जित्थू मातां लाई डेरे दित्ते  
नैण वणे नैणा देवी जीभ है ज्वाला माई  
खब्बी छाती पेई जित्थू तित्थू देवी तारा आई  
(इ) तिहास नि गलांदा पर मेरा है ख्याल भेई  
जित्थू दंदराल पेई बणी धौलाधार गेई

धौलाधार इयां जियां द्रोपदी बचारी होए  
पंजां-पंजां पांडवां छडियो एह हारी होए  
सूरजे दुसासने लेइयो जणी ठाणी होए  
नंगी करी दरोपदी, सभी च नचाणी होए  
किरणां दे हत्थां इयां बरफे पघालदा  
चिट्टे-चिट्टे कपड़यां खिंजी जणी फाड़दा  
बदले दा रूप धरी कृसन मुरारी आई  
रूई-रूई बरफा दी साड़ी हन दिंदे लाई  
काहन जित्ते सदा है दुसासने दी हार होई  
पूरी नंगी इसते नी कदी धौलाधार हो गई.

बैठी रै अट्ठो पैहर चौकड़ी एह मारी नै  
घणे घणे बणां दियां जटां जो खलारी नै  
धुंधा दिया धूणियां रखे एह धुखाई नै  
बरफे दे रूपे धूड़ जिस्में रमाई नै  
चन्द्रमा अग्गे इहदे रैहदा सदा सजया  
बाण गंगा बणी नै बंडेर रैहदा बगया  
कसटुंडां देयां झुंडां है लगाई ईजो मृग छाल  
सिब जी दा रूप पूरा लगदी है धौलाधार



दुनियां चौगान असां सारे हि खिलाड़ी हन  
अपणियां-अपणियां खेलां च मराड़ी हन  
उच्चे टिल्ले बैठी सब खेल दिक्खी जाए एह  
हाखीं हेरी हाल सारे जगे जो सुणाए एह  
कुणी पूरा जोर लाया कुणी है घचोल पाया  
सुक-सिन जित्ति कुजो खरा दया पाला आया  
खेलणे ते मुहरिया ही कुणी मन्नी हार लेई  
पंगे दिया नित्ता कुण आया है गुआर लेई  
कढ्ढा दा है कुण कुस-कुस कन्ने कोई खार  
उच्चिया बटुई सब दिक्खा दी है धौलाधार.

सुणी करी, सोन्नां चांदी बड़ा है मजूद इत्थू  
दौड़दा हि गजनी ते पुज्जा महमूद इत्थू  
जंती माता छाऊणी पाई, किले जो उड़ाया था  
ऊंटा कन्ने घोड़यां ने भौण डेरा लाया था  
सुन्नां चांदी लुटि-लुटि खुआं दे खूह खाली कित्ते  
मूरतां ने चांदिया दे भित्त सब काबू कित्ते  
हटदिया बारिया सै: बत्ता च टरांदा गया  
जगह-जगह चांदिया दे ढेरूआं लगांदा गया  
जाणे तिदे घरे होंगे कितणे अम्बार लगगे  
बत्ता च टराइयो चांदी ही जे धौलाधार लागे